

IL CUSUNZ VALERUS

Ina damaun da stad seseva in cusunz sin sia maisa sper la fanestra averta e cusiva. Qua è passà ina dunna giu per via clamond: “Bunas confituras da vender, bunas confituras.”

Il cusunz ha udì quai, ha chatschà il chau or da fanestra ed ha clamà: “Vegni si tar mai buna dunna, qua savais Vus vender insatge.”

La dunna cun ses chanaster grev è sa tratga si per la stgala ed ha pachetà ora tut sias crias e vaschs da terracotga. Il cusunz ha savurà vi da mintgin ed ha ditg: “Chara dunna, dai a mai 100 grams da quella.” La dunna al ha dà la confitura giavischada, era dentant in pau gritta, perquai ch’ella aveva sperà da pudair vender bler daplì. “Che Dieu benedeschia questa confitura”, ha il cusunz ditg. El ha prendì il paun or da stgaffa, ha taglià giu ina fletta e stritgà si la confitura. “Ma avant che prender l’emprima morsa, vi jau finir il tschop”, ha el ditg dad aut. El ha mess il toc paun daspera ed ha cusì vinavant.

La bun’odur da la confitura ha carmalà natiers ina pluna mustgas. “Ueila, tgi as ha envidà?” ha clamà il cusunz e las ha scurrentà. Ma las mustgas èn turnadas adina puspè. Qua ha il cusunz tschiffà in sdratsch ed ha dà in starmentus sfratg sin la maisa. “A vus vi jau mussar manieras!” Cura ch’el ha tratg davent il sdratsch, giaschevan set mustgas sturnidas sin maisa.

“Tge fegher che jau sun! Quai stoss jau palesar a l’entir mund!” Svelt ha’l cusì ina tschinta ed ha scrit sisura cun gronds bustabs:

SET EN IN CULP

Il cusunz ha lià la tschinta enturn vita ed è partì en il mund per mussar sia forza. Sco marena ha el prendì in toc chaschiel vegl ed al ha mess en giaglioffa. Arrivà dador il mir da la citad ha el deliberà in utschè or dal chagliom ed ha mess era quel en giaglioffa.

Alura è el sa mess sin via ed è arrivà sisum ina muntogna.

Qua seseva in gigant e guardava per il mund enturn. “Bun di cumpogn. N’avessas ti betg gust da vegnir cun mai?” ha il cusunz dumandà. Il gigant al ha guardà da pe a chau ed ha ditg: “Tge vuls ti, ti pauper tamazi!”

“Tge?” ha respundì il cusunz e mussà sin sia tschinta. “Qua pos ti leger tge fegher che jau sun.” Il gigant ha legì:

SET EN IN CULP

ed ha cartì ch’i sa tracta dad umans. Quai al ha fatg in zichel impressiun. Per metter sin la prova il cusunz ha’l prendì enta maun in crap ed al ha smatgà uschè ferm, ch’igl è culà ora aua. “Ussa prova ti, sche ti has tanta forza”, ha il gigant cumandà. “È quai tut?” ha il cusunz dumandà. El ha prendì il toc chaschiel lom or da sia giaglioffa ed al ha smatgà, fin ch’in dagut suenter l’auter è culà ora.

Il gigant na saveva betg pli tge dir. El ha prendì enta maun in crap ed al ha bittà uschè ad aut, ch'ins al ha strusch pli vis. “Fa era ti quai, sche ti es bun”, ha'l ditg. Il cusunz ha respundì: “Ti has bittà lunsch, ma il crap è tuttina puspè crudà per terra. Jau tir ussa in che na turna betg pli.” Ed el ha prendì l'utschè or da giaglioffa, al ha bittà en l'aria e l'utschè è sglà davent per adina.

“Ussa vi jau anc guardar, sche ti es bun da purtar tant sco jau”, ha il gigant ditg ed ha purtà ina gronda planta terrada. “Gida mai da purtar questa planta!” “Gugent”, ha il cusunz ditg. “Prenda ti il bist e jau port la roma cun la feglia, quai è pli pesant.” Il gigant ha mess il bist sin sias spatlas ed il cusunz è sesì sin in rom. Il gigant n'era betg bun da guardar enavos e n'ha betg badà ch'el purtava tut sulet l'entira planta ed era anc il cusunz. Lez seseva sin ses rom e tschivlava sco sch'i fiss facilischem da purtar ina tala planta. Suenter pauc mument ha il gigant sbragì: “Jau na poss betg pli.” Il cusunz è siglì giu dal rom, ha fatg finta da tegnair la planta ed ha ditg: “Ti vuls esser uschè grond e ferm e n'es gnanc bun da purtar ina planta!”

Il cusunz è ì vinavant sulet ed è arrivà a la curt dal palazi d'in retg. Entant ch'el era sa mess per lung en l'erva e durmiva stagn e bain è la glied passada sperasvi ed ha legì quai che steva sin la tschinta:

SET EN IN CULP

“Quel qua sto esser vaira ferm”, ha la glied ditg. Intgins èn ids tar il retg ed han raquintà quai ch'els avevan vis en il guaud. Il retg ha tramess in da ses serviturs tar il cusunz cun il giavisch ch'el duaja entrar en l'armada roiala. Il cusunz è stà d'accord ed il retg al ha retschavì cun bratscha averta.

Ma quai n'ha betg plaschì als auters guerriers ed els han supplitgà il retg da relaschar il cusunz: “Nus na tegnain betg ora cun in che ha sturnì set en in culp.” Il retg na vuleva betg perder tut ses guerriers fidaivels pervia d'in pitschen cusunz. El ha studegià ditg e lung, tge ch'el duaja prender a maun ed ha alura fatg la suandanta proposta al cusunz: “Sche ti es bun da sturnir dus gigants che fan gronds donns en mes pajais, alura survegns ti mia figlia e la mesadad da mes reginavel. Tschient chavaliers ta duessan gidar.” “Bain”, ha quel ditg, “ils gigants vi jau metter a post, ma ils chavaliers na dovr jau betg.”

Ma ils chavaliers n'al vulevan betg laschar ir tut sulet. Cura ch'els eran a l'ur dal guaud, als ha il cusunz ditg da spetgar. Alura è el ì en il guaud ed ha vis bainbaud ils dus gigants che giaschevan sut ina planta e runtivan talmain che la roma tremblava.

Il cusunz ha emplenì sias giaglioffas cun crappa ed è raivì sin la planta. Alura ha el cumenzà a bittar crappa giu sin in dals dus gigants. Ditg n'ha quel badà nagut, ma tuttenina è el sa dasdà ed ha ditg a ses cumpogn: “Pertge ma das ti fridas?” “Ti ta

siemias”, ha l’auter respundì, “Jau n’hai fatg nagut.”

Apaina che domadus eran puspè sa durmentads, ha il cusunz bittà in crap sin il segund gigant. “Diavelen, tge èsi ussa?” ha quel sbragì, “pertge tiras ti ussa crappa sin mai?” “Jau n’hai fatg nagut”, ha quel respundì. Els han fatg dispita anc in’urella ed èn alura sa durmentads danovamain. Pauc suenter ha il cusunz bittà il pli grond crap ch’el aveva sin l’emprim gigant.

“Ussa basti!” ha quel sbragì ed ha schlavazzà l’auter cunter ina planta. Lez è sa dustà ed alura han els stratg ora plantas, han dà fridas in l’auter fin ch’omadus èn stads per terra, stagn morts.

Il cusunz ha prendì sia spada e l’ha furà a mintgin en las costas. Alura è el ì tar ils chavaliers ed ha ditg: “La lavur è fatga, ma igl è stà ina mazzacra.”

Il cusunz ha pretendì la part empermissa dal retg. Ma quel è s’enrichà d’avair empermess uschè blier ed ha ditg: “Avant che ti survegns mia figlia e la mesadad da mes reginavel, stos ti anc tschiffar in unicorn che fa grond donn.”

“D’in unicorn hai jau anc pli pauca tema che dals dus gigants”, ha respundì il cusunz.

“Set en in culp, quai è insatge per mai!”

El ha prendì ina suga ed ina sigir ed è ì danovamain en il gaud. I n’ha betg durà ditg che l’unicorn è siglì vers el sco ina furia per al prender

sin sia corna. Il cusunz però è stà eri ed ha spetgà fin che l’unicorn è stà fitg manavel. Alura è el siglì davos la planta e l’unicorn n’ha betg pli pudì sa fermar. El è siglì en la plantà ed ha fitgà sia corna lien. Il cusunz è vegnì davos la planta nà, ha lià l’unicorn cun la suga e cun agid da la sigir è el stà bun da far liber la corna.

Ma il retg n’era anc adina betg cuntent ed ha ditg al cusunz: “Avant che far nozzas cun mia figlia, stos ti tschiffar in portg selvadi che fa ir en malura mes guauds.”

“Quai è ina piculezza”, ha respundì il cusunz. Dals chavaliers n’ha el betg vulì far diever e quels èn stads leds e cuntents perquai ch’els avevan già gè differentas entupadas cun questa bestga. Cura ch’il portg selvadi ha vis il cusunz, ha el mussà ils dents ed è siglì vers el en tutta gritta per al bittar per terra. Il cusunz è mitschà en ina chaplutta vischinanta ed il portg selvadi è currì suenter. L’umin ha fatg in sigl or da fanestra ed è turnà immediat tar la porta da la chaplutta e l’ha serrà cun in sfratg. Il portg selvadi era blier memia gross per siglir or da fanestra ed è stà en la trapla. Il cusunz ha clamà ils chavaliers sco perditgas per sia bravura. Alura è el ì tar il retg. Quel ha la fin finala stuì tegnair sia empermissun ed ha dà sia figlia e la mesadad da ses reginavel al cusunz. E quel è restà retg per vita duranta.